

ANDLEGT ÞJÓÐARRÁÐ BAHÁ'ÍA Á ÍSLANDI
THE NATIONAL SPIRITUAL ASSEMBLY OF THE BAHÁ'ÍS OF ICELAND

Alþingi

Erindi nr. P 139/1654

komudagur 10. 3. 2011

Nefndasvið Alþingis
Austurstræti 8-10
150 Reykjavík
nefnadasvid@althingi.is

Efni: Umsögn um þingsályktunartillögu
um staðgöngumæðrun, þskj. 376 — 310. mál.

10. mars 2011

Andlegt þjóðarráð bahá'ía á Íslandi þakkar að hafa fengið til umsagnar þingsályktunartillögu um staðgöngumæðrun, sbr. tölvupóst Nefndasviðs Alþingis 28. febrúar sl.

Þótt staðgöngumæðrun kunnri að virðast einföld í framkvæmd með nútímataekni eru siðferðileg og sálræn álitamál sem að henni lúta öllu flóknari og sérlega viðkvæm. Hin náttúrulegu og tilfinningalegu tengsl foreldra og barna eru hugsanlega sterkari og flóknari en svo að þau verði endurgerð með einföldum lagaramma.

Í bahá'í trúnni er líkt og í öðrum trúarbrögðum lögð áhersla á fjölskylduna sem grunneiningu og hornstein samfélagsins en hlutverk hjónabandsins felst ekki síst í því að ala upp nýja kynslóð af ábyrgð, ástríki og visku. Ábyrgð á eigin lífi og afkvæma sinna nær einnig til kynfruma. Egg og sæði eru því hvorki sölu- né gjafavara.

Staðgöngumæðrun er vissulega ætluð til þess að veita barnlausu fólki þá gæfu að ala upp börn. Alla kosti verður þó ævinlega að skoða í ljósi heildarsamhengis, blóðforeldranna, staðgöngumóðurinnar og fjölskyldu hennar, en ekki síst barnsins sjálfs. Ætt og uppruni og samhengi kynslóðanna eru ríkur þáttur í tilvistarvitund okkar og sjálfsmynd. Aðskilnaður foreldra og barna veldur oft ómældum sársauka. Hvort staðgöngumæður geti forðast að bera tilfinningar til barnanna sem þær bera undir belti, eða hvort slíkt tilfinningaleysi sé hollt – allt eru þetta veigamikil atriði sem þarf að hugleiða af fullri alvöru.

Í tillögunni er vissulega gert ráð fyrir skilyrðum til að sporna við því að greitt sé fyrir þjónustu staðgöngumæðra og að hún verði veitt í hagnaðarskyni. Hæpið er að gera ráð fyrir að slíkir varnaglar haldi en hitt skiptir ekki síður máli hvort meðgönguþjónusta stuðli í raun að aukinni farsæld allra viðkomandi aðila, hvort sem sú þjónusta væri launuð eða ekki.

Þótt andlega þjóðarráðið hafi ævinlega forðast að þröngva siðgildum bahá'í trúarinnar upp á aðra hljótum við að biðja fólk að hugsa sig tvisvar um hvort rétt sé að stíga inn á þá hæpnu braut sem við teljum staðgöngumæðrun vera.

Fyrir hönd Andlegs þjóðarráðs
bahá'ía á Íslandi


Róbert Badí Baldursson, ritari